



Inlicher kum mer vnd widerwärtigkeit  
entstond von falscher betrugnuß erdach  
ter wort / das hab ich sprach Wisles der  
kung zu Sendebart sinem wysen wol ver  
numen in den fabeln So du mir gefaget  
hast bis dz der löw senespa tod schlug nun  
offnen mir wie sich Dymnas sach begab  
bis uff die zyt das der löw in ouch tödten  
hieß Antwort sendebart / herz künig man  
sagt da der löw senespa ertödt het nach  
ettlichen tagen darnach rouw es in hart  
das er sollich so schnell vñ on güt vor be  
trachtuß gethon in ouch mit vor zu red gestalt oder kummen  
lassen het Dann er was angedenck sins gütten getruwen rates  
Siner vernunft vnd adelichs gemessen wandels vnd darumb  
nam sich der löw an vil vnd uil zu sitzen vñ zu wonen ergetzlich  
geschäftes da durch er dis sins widermütes vergessen vñ den in  
fröud gewandeln möcht Nun was vnder den selben seiner diener  
emr der löpart vnd nach dem vnd er der eltest vnd der edler was  
für ander des künigs diener Do nam in der kung zu siner sundern  
vnd heimlichen in sin kamer von dem er ouch alltag rat nam vñ  
handelt mit im heimliche ding vñ behielt in stätes by im Es be  
gab sich uff em zyt / das diser löpart aubentz by der nacht durch  
das huf gon ward da Dymna vñ kellile in wonten vñ hort die  
wort kellile Wie er dymna strafft vñ die grossen verrätery die er  
gegen dem kung getribt damit er in zu de todschlag senespas ge  
reitzet vñ bracht het Wen kellila wißt allen handel den dymna  
wider senespa on alle schuld geübt het vñ vergewisset in das er  
von dem löwen darumb nymer vngestraft kām dan es war vñ  
müglich das solicher mord den er durch sin lügen vnd uffätz zu  
getriben het zu letst mit geoffenbart vñ sinen lon darumb nem  
en solt Des antwort dymna vnd sprach / nein es ist nun so fers  
kumen das es mit müglich ist das es mer geoffnet werden mög  
Darumb ist der wort fürer zu schwoygen / vñ weg zu süchen wie  
man des löwen gemüt von seiner trugigkeit wider bringē möcht  
vnd de mit wyter nach zübetrachten den es ist geschehen vñ hat  
mich doch selbs geruwen dz ich des vrsach gewesen bin vñ hat  
mich doch min gelust darzu getrunge / dis alles hort der löpart  
vñ er gieng zu des löwe müter vñ sagt wz er vñ disen zweyē ge  
hort het doch verhieß sy im dz keine lebēdigen mensche zusagen